

TE HEHEURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 8.

Atete 1930.

Mat. 24.

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo"
i papaihia e Tamate Aposetolo; Faaauhia ei reo Tahiti e Elita.

HIRO'A FAAROO 12. *Te faaroo nei matou e, ia au-
rarohia te mau arii, te mau peresideni, te mau faaterehau, e
te mau haava, ia haapaohia, ia faaturahia, e ia faaturahia
atu hoi te mau ture o te fenua nei.*

Uiraa 5. Mai te mea e faatia te hau i te hoê ture ei
patoiraa i te hoê mau ture na te Ekalesia, eaha ia
to te Ekalesia raveraa i reira?

P. E uiraa teie i ui-pinepine-hia mai i to te Ekalesia,
e ua tia ia tatou ia pahono atu i te reira mai ta Iesu i pahono
i te mau pharisea, oia hoi: E hopoi i ta Kaisara ia'na, e
hopoi i ta te Atua ia'na. I teie nei taime tei raro aé tatou
i te faatereraa no te hau e no reira ia haapao tatou i te hau
e tia'i. Ahiri râ ua faatia te hau i te ture au ore i te Ekale-
sia te vai ra te ravea e patoi ai i te reira na roto i te haava-
raa mai ta te hau i faatia; mai te mea râ aita te taata i ma-
nuia i te reira, te vai ra te tahi ravea na'na ra, oia hoi te
pure i te Atua ia haamarû i te aau no te mau taata faatere
hau.

Parau Tauturu: Mai te mea ua horoa mai te Atua i te hoé ture e aita e nehenehe i te taata ia haapao i te reira no te mau hamani-ino-raa o te enemi, tei te enemi te utua no te ofatiraa i te reira ture, e aita te Atua e tapea noa i te Feia Moá i raro aé i taua ture ra. Buka Fafau 124:49-50.

Te vai ra te hoé ohipa tei riro ei hohoá no to te Feia Moá faaroo i te haapaoraa i te ture. Ua horoa mai te Atua i te heheuraa no te faaipoiporaa i te vahine i nia aé i te hoé. Ua haapao te Feia Moá i te reira ture i Utaha e hoé ahuru matahiti mai te peapea ore, no te mea aita e ture tei opani i te reira peu. I te matahiti râ 1862 ua tuuhia te ture hau tei opani i te reira, i reira ua haavahia te reira ture i roto i te mau haavaraa'toa e tae roa'tu i te haavaraa teitei no hau, e i te taime i itehia'i e, e ture mau te reira e ua mana oia i nia i te taata'toa, o te opaniraa ia i te reira huru faaipoiporaa i rotopu i te Feia Moá; e i teie nei â mau mahana aita roa'tu te reira peu e ravehia nei.

Te Mori Pata

I te tahi mahana aénei ua haere maira te hoé tamaiti i to'na ihora papa, ua ui maira oia ia'na ra, na ô maira, "E papa e, o vai ia te Atua?" Ua pahono atu te papa ia'na i te na-ô-raa'tu e, "O vau ia to oe metua i te ao nei, oia hoi ua riro maua to oe mama ei na metua no oe i to oe fanauraahia i roto i teie nei ao tahuti nei. Ua pâpû hoi ia oe taua vahira no te mea na ite oe ia'u i to'u tiaraa metua i nia aé ia oe. Te Atua râ, o to oe ia metua i te ao ra. Na'na hoi oe i hamani i te ao varua na mua aé i to oe fanauraahia i roto i teie ao tahuti nei. Mai ta oe e haapao nei ia'u i te mau vahita'u e parau nei ia ce, e rareina atca ce i te haapao i te mau faaueraa te tunhia mai e to Metua na i te ao ra."

I te otiraa no teie parau a te papa i to'na tamaiti ua

faaea maoro rii te tamaiti mai te parau ore. Ei reira râ ua parau atura taua tamaiti ra i to'na metua, na ô atura, "E papa e, ua hinaaro vau ia ite au i to'u Metua i te Ao ra mai ta'u e ite nei ia oe na." Ua pahono atura te papa ia'na, na ô atura, "E no te aha oe i hinaaro ai i te reira?" Ua parau maira te tamaiti ia'na ra, "No te mea ia ite pâpû i te hoé mea, i reira e riro ai taua mea ra ei mea pâpû ia oe, aita to oe e tapitapi faahou."

I taua taima ra ua parau atura te papa i to'na tamaiti, na ô atura, "A afai mai na oe i te mori pata ia'u nei. I teie nei, a pata na ia ama te mori." I reira ua na ô te tamaiti i te uiraa ia'na, "No te aha oe i faaue ia'u ia na reira, ua ite ê na vau e, ia patahia te mori e ama iho â."

Parau atura te papa ia'na ra, na ô atura, "No te aha ra i ama ai te mori ia patahia?" Ua pahono atura te tamaiti i te na ôraa ia'na, "Ua î te piri i te uira, e no reira ia patahia te mori e ama iho â." Ua ni atura te papa i to'na tamaiti a, "Ua ite anei oe i te uira i roto ra?" Pahono ihora te tamaiti ia'na, na ô maira, "Aita vau i ite i te uira, ua pâpû râ ia'u e, e ere ïa no te piri i ama ai te mori, maori râ no te uira e vai nei i roto i te reira. Aita e mana to te piri ana'e ra ia faaama i te mori no te mea ia tahito rii te piri ua pau te uira i roto, ei reira aita ïa e ama faahou te mori."

Ua parau atura te papa i to'na tamaiti, na ô atura, "Te reira iho â ïa te vahi ta'u e titau nei ia oe na. Hoé â huru to tatou metua i te ao, aore tatou e ite nei ia'na iho, te ite nei râ i to'na mana i roto i te mau mea no te ao nei. Mai te uira, aore i itehia e oe, ua itehia râ te ama o te mori ia patahia, mai te reira atoa to Metua na i te raïra. O te Atua ïa te tumu o te mau mea ora o teie nei ao, oia ia, ona ïa te metua mau no oe, e i te taima ta'na i pata i ta'na mori no te ora i roto ia oe na, i taua taima ra ua riro atura oe ei mea ora no te mana e vai nei i roto ia'na."

Papahia e Mati.

E Faaore i te Ino i te Maitai

E enemi to oe? Ua hinaaro anei oe i te haapue i te auahi arahu i nia iho i to'na upoo, e ua hinaaro anei oe i te haapohe i te ino ta'na i faatae i nia iho ia oe na, e e faahama ia'na?

E mai te mea ra te hinaaro nei oe i te rave i taua mau mea ra i to oe na enemi, te vai nei te ravea, e o teie ia, "E teie nei, te poia ra to enemi, faaamu atu ia'na; e te poiha ra, faainu atu ia'na; te haapue ra hoi oe i te auahi arahu i nia iho i ta'na upoo i reira. Eiaha ia pohe i te ino, ia pohe râ te ino ia oe i te maitai." (Roma 12:20,21.) E ho'ma e, ua iti hoi e ua varavara roa te mau taata o tei ite pâpû i te parau mau tei papaihia i roto i taua na irava e piti ra.

Ia haere mai te hoé taata ia oe na ia faaino mai ia oe e mai te mea ra e faahoí atu oe i taua ino ia'na ra, eaha ia to'na huru i reira? E haama anei oia, e marû anei oia e e haamanaó anei oia i ta'na hape? Eita roa'tu, e manaó râ oia e, ua tano roa ta'na faainoraa'tu ia oe e e riri huâ oia e e faaino faahou mai oia. Ia tamata râ oe i te haapao i taua na irava ra i te taime o taua faainoraa ra eite ai oe e, e parau mau ia. Ei reira e ite oia e, ua hara oia e e tae taua maitai i nia iho ia'na ra mai te auahi arahu te huru no to'na haama i te ino ta'na i rave. Eita e maoro e ani mai oia ia faaorehia ta'na hara.

E mea ohie ia riri oíóí roa, e e ere ia te ohipa rave atâ ia faaino te tahi i te tahi, e e ere atoa te taata paari o te rave nei i taua mau peu ra, o te maamaa râ ia. No reira ia hió mai tatou i to tatou iho huru e tia'i, e mai te mea ra e nehenehe ia tatou ia faaoromai e ia haapohe i te ino i te maitai, ua riro tatou ei taata paari.

O teie ia te tahi huru o te taata paari mau. E feruri oia na mua e e parau oia na muri. Te maamaa râ, na mua ta'na

parauraa e na muri to'na feruriraa, e no reira e mea ê roa ta te tahi parau i ta te tahi ra.

E haamanaó râ tatou a tupu ai te hinaaro i te haapue i te auahi arahu i nia iho i to tatou enemy, a tamata i teie ravea ia ite tatou e, o te hoé noa iho ravea ia i te haapohe i te ino.

Papaihia e Eduana

QUETZALCOATL

I rotopu i te mau taata Maohi i teie paeau moana nei ua ite tatou e, te vai ra te mau parau tutuu a te hui tupuna ra no te tau tahito roa. Aita ia ratou i te papai i to ratou mau manaó e no reira ua tamau noa ratou i te mau parau tutuu, haapii ihora te metua i to'na mau tamarii i tana mau parau ra ia ore ia moé. No to ratou na reiraraa i te mau mahana i mutaa ihora te vai noa nei â taua mau parau tuatapapa i teie nei â mau mahana. I ó i te fenua Marite ra te vai atoa ra te hoé mau taata o tei na reira noa mai te tau tahito mai. O taua mau taata ra o te ati Inidia ia, e te ora nei â ta ratou mau huaai.

I roto i te Buka â Moromona ua ite tatou te vai ra na ati e piti, oia hoi te ati Lamana e te ati Nephi. Te ati Nephi ra, o ratou ia te feia i te papai, e o ratou ia tei papai i te mau parau no taua Buka nei, area te ati Lamana ra, aita roa ia ratou i papai i ta ratou parau tuatapapa. Ua tamau ratou i te parau a to ratou mau tupuna e i te mau aamu rii no te fenua, haapii ihora te mau metua i to ratou ra mau tamarii e tae noa mai i te mau mahana i tae ai te mau papaa matamua i rotopu ia ratou. I teie nei ra e vai'ihori tatou i te reira vahi.

I te matahiti 1829 ua nenehia te hoé buka apî i te fenua

Marite. Taua buka ra o te hoé mau parau ia o tei iritihia ei reó Baratane e Iosepha Semita. Ua faaite maira Iosepha i to te ao nei e, na te hoé melahi i horoa i teie mau apî ia'na ia iritihia e ana ra. Te faaroo nei to te Ekalesia "Momoni" i taua buka ra e te tiaturi nei ratou e parau mau ana'e ra to roto. I roto i teie parau poto te hinaaro nei au i te faaite pâpû i te hoé manaó o tei haapâpû i to tatou tiaturiraa i taua buka ra ei parau mau.

I roto i te Buka a Moromona ua faaitehia te mau parau no to Iesu haereraa mai i te fenua Marite i muri aé i to'na faasatauroraahia i Ierusalema ra. Ua ootihia teie nei mau parau i nia i te hoé mau apî auro e te taata papai parau a te Ati Nephi, e o taua mau apî i hora ia tei horoahia ia Iosepha Semita ia iritihia ei reó Baratane. Te parau nei te tahi mau taata e, na Iosepha iho taua parau nei i papai e e haavare ana'e ra to roto. Teie râ te vahi o tei faatupu i to tatou maere rahi. I rotopu i te mau taata o te ati Lamana, oia hoi te Inidia i Marite, o ratou o tei ore i papai i to ratou parau tuatapapa, te vai nei te hoé aamu o tei tamauhia i rotopu ia ratou e tae roa mai i to tatou mau mahana nei.

Teie ia taua aamu ra; "E taata uôuô oia e te mata maitai. E mea ereere to'na rouru, e e huruhuru taa'toa to'na. E taata marû oia e te haapao maitai i to'na mau peu. E toru tumu te vai ra no te aroha e te faatura a te mau taata ia'na; 1. Na'na i haapii ia ratou i te ohipa no te paeau tino; 2. Na'na i faaore i te pûpûraa i te tusia ora; 3. Na'na i opani i te tamaí e i te mau huru hamani-inoraa'toa. E mea maoro teie nei taata i rotopu ia ratou e i reira ua haere atu na te purumu ta'na i haere mai i te matamua. I to'na revaraa'tu ua afai atoa oia i te tahi mau taata e ia tae atu i te vahi atea ua parau atura oia ia ratou ia hoi i te fenua e faaite i te mau taata e, te vai ra te mahana



TE INIDIA

e hoí mai te papaa i to ratou fenua''. Te i'oa no teie taata o Quetzalcoatl ia, e te haamori ra te mau Inidia ia'na i te taeraa mai o te mau papaa matamua i rotopu ia ratou.

No te mea aita te mau Inidia i papai i to ratou mau parau tuatapapa ua faahuru-ê-noa-hia e te tahi ui e te tahi ui. I te mau mahana i haere ai te mau papaa i te fenua Marite i te matamua roa na ite noa ratou i te Inidia i te haamoriraa i teie taata.

I roto i te parau papai a te Ati Nephi ua pápû roa te parau no to Iesu haereraa mai i rotopu ia ratou. Na Iesu iho i faaore i te pûpûraa i te tusia ora, na'na i faaore i te mârô e ite tamaí, e na'na atoa i vai'iho mai i ta'na mau haa-

piiraa paari ia ratou. Ua huru ê rii na parau e piti i te tahi nau vahi, tera râ, hoé ahuru te parau papai a te ati Nephi (te Buka a Moromona) e te parau tutuu a te mau Inidia i te pae rahi roa o te mau vahi, maori râ ua pâpû roa'tu te parau papai i te parau vaha noa. I teie nei te vai nei na ite e piti no to Iesu haereraa mai i te fenua Marite, oia hoi te Buka a Moromona e te parau tutuu a te Inidia i Mexico.

“E mamoe ê atu â ta'u, e ere i to teie nei aua, e aratai atoa mai au ia ratou e tia'i, e faaroo mai hoi ratou i to'u reó, ia hoé a'e nănă, e hoé hoi tiaï.” (Ioane 10:16) Na teie irava i faaite mai ia tatou e, e mamoe ê atu ta Iesu. E ere anei teie mau taata i Marite tei mau noa i teie aamu no to'na haereraa mai ia ratou.

Papaihia e Mati

A Arue i Tei Horoa Mai

Ia arue atu tatou i te Atua e tia'i mai te au i te parau ta Paulo e haapii mai nei i roto i te Korinetia II pene 10:17-18. “O tei arue râ, ia arue oia i te Fatu. E ere hoi o te haamaitai ia'na iho tei itehia mai, o ta te Fatu râ i haamaitai.”

Te ite nei tatou e, na roto i te taióraa o teie parau, te titau mai ra Paulo i te feia i te tau tahito ra ia arue atu i te Fatu i roto i te mau mea ta ratou i rave ra. Ua ite paha Paulo i te huru i rotopu i te feia i te tau tahito mai te au i ta tatou e ite nei, oia hoi ia rave te hoé mau taata i te hoé ohipa rahi e aore râ i te mea maere e parau ratou e, na ratou iho tera ohipa i rave. Aita roa'tu ratou e haamanaó e, na te Atua te ite e te paari i horoa mai ia ratou e nehenehe

ia ratou ia rave i te reira mau mea. Tira ra ta ratou e titau nei, maori râ te mau haamaitairaa a te taata nei. Ua ite hoi tatou i te reira huru ia tatou nei, e ua ite atoa tatou e, ia ore anaé ta te taata haamaitai ia ratou, aita tatou e faaroo faahou i te parau na ratou no te mea aita te pae rahi o te reira huru feia i arue i te Atua no ta'na mau tautururaa ia ratou.

Te feia râ o te arue atu i roto i te mau ohipa ta ratou e rave, e ore roa ta ratou ohipa e ore no te mea e ohipa maitai anaé ia. Aita e nehenehe ia tatou ia arue atu i te Atua na roto i te ohipa ino, na roto anaé râ i te raveraa i te ohipa e au i te hinaaro O Tei Hamani ia tatou. No reira ua au teie nei parau e, "E ere hoi o tei haamaitai ia'na iho tei itehia mai, o ta te Fatu râ i haamaitai.

Eaha te tumu ia arue atu tatou i te Atua e tia'i, o te vahi ia ta tatou e feruri nei. A haamanaó tatou e, mai te mea e, e haamaitai mai e e tauturu mai e e haapii mai te hoé taata ia tatou i te ohipa maitai, e faahoí atu tatou i te faitoraa o te mau mea ta'na i rave na roto i te mau ravea e tia ia tatou ia rave.

Ua pâpû roa ia tatou e, tei te Atua te ite mau no te mau mea atoa, e no reira e farii tatou Ia'na ei orometua rahi na tatou. Te faaite maira oia e, "O van te maramarama o teie nei ao, o te pee mai ia'u ra, e ore ia e haere noa i te poiri, e maramarama ora ia to'na." (Ioane 8: 12)

No reira e arue atu â tatou i te Atua na roto i te mau mea maitatai ta tatou e rave.

Papaihia e Coleman

Te Mau Parau Apî

TE FAATITIAUARAA POTI UIRA

I teie paeau moana nei te vai nei to tatou mau vaa taié, e ia afaro te matai e mea huru tere aloa. Tera râ ia taió tatou i te parau apî no te hoé taata Baratane o tei faatere i to'na poti uira i roto i te hoé faatitiauaraa i te fenua Baratane, e ite tatou e mea taere roa te mau huru poti o tei tia-turi i te matai anaé ra. I taua mahana ra te faatere ra teie taata i to'na poti uira e ua hape rii ta'na tapearaa i te hôe, e no taua hape ra ua huri roa te poti. I te huriraa o te poti te tere ra 100 maile i te hora hoé. No te puai o te tere ua hurihia teie taata faatere i rapae i te poti i te titapouraa e ua fati na rima e piti no'na ra e ua manaóhia ua pêpê atoa te tahi mau melo i roto ia'na, pohe roa i hora oia. To'na ra taata tauturu râ, ua mau to'na tiro i roto i te poti e i te titapouraa ua paremo oia. Noa'tu to raua poheraa ua papaihia te rê matamua no te ao nei na raua no te mea aita e â te tahi atu â poti i faaterehia i taua faito ra.

TE RE MATAMUA NO TE AONEI

Ua tae mai te parau apî no te motoraa rahi no te rê matamua no te ao nei. E toru matahiti aénei ua moto Jack Dempsey raua o Gene Tunney e ua riro te rê ia Tunney. I muri mai i te reira ua moto faahou Tunney i te tahi taata e ua upootia oia i taua taima atoa ra. I reira ua parau mai-ra Tunney ua ona oia, faaea i hora oia i te moto. No to'na faaearaa ua vai'ihohia te rê matamua i roto i te hoé tamataraa, oia hoi, ua maitihia te hoé mau taata ite i te moto, haamata atura raton i te moto te tahi i te tahi, pohe i hora

te hoé, toe maira te tahi. Tei ora mai râ i roto i te motoraa matamua, ua moto faahou atu oia i te tahi taata ê atu e ua na reira noa ratou e tae noa'tu ua toe noa mai e piti taata tuiroo. Te tahi o teie nau taata ra e Marite ia, o Jack Sharkey to'na i'oa. Te taata râ ta'na i moto ra e taata Purutia ia, o Max Schmelling to'na i'oa. I teie avae Tiunu i mairi aénei ua moto raua i te fenua Marite e ua upootia te taata Purutia. Te faaite mai nei te mau vea no ó roa mai e, i roto i te mau raunu atoa ra tei ia Sharkey te taió rahi, area râ i roto i te maha o te raunu ua hape oia i te ture, e ua horoahia te rê ia Schmelling. Ua parau maira te taata haava e, ua moto Sharkey i raro atu i te hatua e no reira i ere aia'na te rê matamua ta'na i titau.

E MAU TAATA HOO TOTO

I te mau fenua papaa te vai nei te hoé mau taata o te hoo noa i to ratou toto ei faaoraraa i te mau taata pêpê. E maere tatou i teie huru parau, tera râ ia haapâpû i te mau tumue i te huru mau o te raveraa, eita tatou e maere faahou. I te mau mahana atoa ra i te mau fare maí rarahi te afaihia mai nei te mau taata pêpê e te motumotu ia faaorahia ratou. Te tahi mau taime ua tahe to ratou toto e tae noa'tu ua iti roa tei toe mai. Ahiri aita i tuu-faahou-hia te toto i roto i to ratou tino e pohe roa iho â ratou. No taua ite ra i roa i te mau taote, ua imi atura ratou i te hoé ravea ia tuu i te toto apî i roto i teie mau taata pêpê. I roto i ta ratou imiraa ua itehia e, e mea huru ê roa te toto no te tahi taata i to te tahi e ahiri ratou i tuu i te toto hape e pohe roa taua taata ra ta ratou e tamata nei i te faaora. Ia oti ta te mau taote imiraa i teie mau vahi ua tarahuhia te hoé mau taata tino puai no te horoaraa i to ratou toto ei faaoraraa ia vetahi ê. Ia afaihia mai te hoé taata pohe maí ia ratou e parau noa te taote i te taata hoo toto ia haavitiviti mai i te fare maí. Ia

tae atu oia ra e tapuhia'i to'na rima e e tuuhia te hoé uaua nainai i roto i te vahi i motu ra, faatahe atura i to'na toto i te vahi i tapuhia i roto i te rima o te taata pêpê. Mai te mea e haapao maitai te taata hoo toto i to'na tino e i ta'na mau maa te amuhia ua nehenehe ia'na ia hoo i to'na toto e maha ahuru taime i te matahiti hoé. Te moni ra e roaa ia'na i te faataheraa hoé ra, mai te piti ahuru dala moni Marite e tae noa'tu i te pae ahuru dala. Ia oti to'na toto i te faatahehia e te mau taote ua huru paruparu oia no na mahana rii, ia hope râ te hoé hebetoma ua itoito faahou oia e ua haamani-faahou-hia te toto e to'na tino.

E MEA ROA HOI

Ua amui mai te hoé taata no te hoé totaiete faatere pahi reva i te fenua ra i Amerika, i te mau maile ta to ratou mau pahi reva i haere, mai te haamataraa o ta ratou ohipa afai rata no te hau, e tae noa mai i teie nei. E mai tei au i to'na feruriraa ua tae te reira i te 10 milioni maile. Ua na ô maira oia e, ua au hoi taua roa ra i te atea mai te ao nei e tae noa'tu i te marama e hoi mai e piti ahuru ma piti taime.

E FAAIPOIPORAA API

Ua faaipoipohia i te vau o te matahiti. Ua fanau i te ahuru e ma piti e ia tai i te piti ahuru o to'na matahiti ua ruau. E manao iho â tatou e haavare teie parau, e ere râ ia. I te fenua Inidia i Asia ra te reira ia ta ratou peu. I teie nei râ ua faaauhia te hoé ture apî e te hau Baratane tei opani i te tamahine ia faaipoipohia na mua i te ahuru e ma maha o to'na matahiti, e te tane ra, ia tae i te ahuru e ma vau e au ai. Te faaite mai nei te vea no taua hau ra e, e 250,000 tamahine tei ore i tae i te pae o to ratou matahiti tei oti râ i te faaipoipohia i te tane.

M. Bonnet M. Gerant et Imprimeur,
Rue Brea et de la rue Dumont d'Urville, Orovini, Papeete